

La Quotidiana 18-1-2016, p.2

Il Grischun noda 9000 pernottaziuns damain per il november passà

■ (rtr) Il november 2015 ha il Grischun nudà 80 000 pernottaziuns. Envers il november 2014 è quai in minus da 10,2% ed envers la media dals ultims tschintg onns è quai in minus da 14,3%. Cumpareglià cun l'onn passà resulta per la hotellaria grischuna il november in minus da sur 10%, komunitgescha l'Uffizi grischun per economia e turissem. Pertutgadas èn surtut las destinaziuns Tavau Claustra (-36,2%), Val Son Pieder (-31,2%) ed il Partenz (-23%). Cun grondas differenzas regiunals han pliras destinaziuns sco Bravuogn Filisur e la Val Bregaglia registrà in plus.

Las pernottaziuns en Svizra èn stadas stabilas il mais november. En total ha la hotellaria svizra registrà il november 1,9 milliuns pernottaziuns. Cumpareglià cun il november 2014 è quai in plus da 1700 pernottaziuns u 0,1%. Quasi in milliun pernottaziuns derivan da giasts da l'exteriur, scriva l'Uffizi federal da statistica.

En nov da 14 regiuns turisticas da la Svizra èsi da constatar ina sminuziun da las pernottaziuns. Il pli fitg ha patì il Vallais cun 9700 pernottaziuns damain ch'il november 2014. Il Grischun ha nudà in minus da 10,2% u 9100 pernottaziuns. Geneva ha però nudà in plus da 6,4%, ed er per il Tessin e la Part sura bernaisa sa mussa in trend ensi (+4,3%).

Per il temp da schaner fin november 2015 po la Svizra uschia nudar 33,1 milliuns pernottaziuns. Quai è bunamain in quart milliun pli pauc che per la medema perioda dal 2014. In trend che l'uffizi noda è l'augment dals giasts asiatics (+12,6%). Il pli ferm augment è d'attribuir als Stadis dal Golf che han procurà per 6300 pernottaziuns dapli. Percunter para la Svizra d'esser main attractiva per giasts da l'Europa. Totalmain resulta per il november ina digren da 28 000 pernottaziuns. Il pli fitg èn sa sminuidas las cifras da giasts tudestgs.